

**2026-mut aningaasanut inatsisissatut siunnersuut**

(Aningaasaqarnermut Akileraartarnermullu Naalakkersuisoq)

**Akissuteqaat****Pingajussaaneerinninneq***Aallaqqaasiut*

Ataatsimiititaliap 2026-mut Aningaasanut inatsisissatut siunnersuut sukumiisumik suliarisimammagu, suliallu ingerlanerani pilersitsiviulluartumik suleqatigiinnermut, Naalakkersuisut sinnerlugit Aningaasaqarnermut Akileraartarnermullu Ataatsimiititaliaq qutsavigaara.

Peqatigisaanik pilersitsiviulluartumik isumaqatiginninniarnernut partiit tamaasa qutsavigaakka. Aammattaaq partiit aningaasanut inatsit pillugu isumaqatigiisummut tunuliaqutsiisut, qutsavigaakka. Piffissami nutaanik aningaasaqarnikkut anigorniagassa qarfigisatsinni aammalu inuiaqatigiit aningaasaataannik isumatusaartumik pingaarnersiuisusaanitsinni, ataatsimoorluta aaqqiissutissarsinissamut akisussaassuseqarneq piumassuseqarnerlu takutinneqarmat neriulluarnarpoq.

Politikkikkut nutaamik aallaaveqarneq 2026-mut Aningaasanut inatsimmi takuneqarsinnaavoq, pisortat aningaasaqarneranni oqimaaqatigiissitsinerup pitsaanerulersinnissaa, ineriartornissamut nutaanik periarfissaqalersitsinissaq aammalu innuttaasunut inuiaqatigiillu tamakkiisutut isigalugit iluaqusiinerpaaffissaanni isumalluutit atorneqarnissaasa qulakkeernissaa, tassani pingaartinneqarluni.

*Piffissami aningaasanut inatsisip atuuffissaani akisussaassusilimmik aningaasaqarnikkut oqimaaqatigiissitsineq*

Allannguutissatut siunnersuutit saqqummiunneqartut akuerineqassappata, piffissamut 2026–2029-mut 60,4 mio. koruuninik ingerlatsinermi sanaartornermilu sinneqartooruteqarnissaq (IS-ip inerneru), 2026-mut aningaasanut inatsimmi naatsorsuutigineqarpoq. Aningaasanut inatsisip akisussaassusilimmik ukiunut arlalinnut aningaasaqarnikkut killissaliussat iluanni suliarineqarnera tassani takuneqarsinnaavoq, pingaarnertigut oqimaaqatigiissitsineq navianartorsiortinnagu nikerarallartussat iliuuseqarfigineqarlutik.

Piffissami pilersorneqartussat pilersuisussanit amerlanerullutik aammalu atugarissaarnermut suliassa qarfinni aningaasartuutit isertitaniit sukkanerusumik amerliartuinnarlutik pisoqarfiusumi, aningaasanut inatsisissamut siunnersuut suliarineqarpoq. Taamaattumik pisortat suliassa qarfiini sunniuteqarluarnerulersitsinissamik aammalu isumalluutit siunnerfeqarnerusumik atorneqarnissaannik suliaqarneq, Naalakkersuisut aallartippaat. Taamaattoq 2026-mi ataatsimoortumik tapiissutit tamakkiisumik akinut aningaasarsianullu

iluarsineqarnissaat pillugu kommuninut isumaqatigiissut malillugu sipaarutissatut pilersaarutigineqartut naatsorsuutigineqaqqaartunit annikinnerupput.

Piffissami aningaasanut inatsisip atuuffissaani ataatsimoortumik aningaasaqarnikkut atorneqarsinnaasut 60,4 mio. koruuniupput, tamannalu ukiuni aggersuni nutaanik pingaarnersiutinissamut killilimmik periarfissiivoq.

Imigassat aalakoorartortallit, tupat aamma biilit ikummatissanik nunap iluaneersunik ingerlatillit eqqunneqartartut ikilisimanerisa malitsigisaanik eqqussinnermut akitsuutit appasinnerusut, isertitassatut missiliorneqartuni nutartikkani takuneqarsinnaavoq. Taamatut ineriartortoqarnera aalisarnermit, pingaartumik avataasiorluni saarullinniarnemit, isertitat amerliartornerisa ilaannit illuatungilerneqarpoq, tamannalu piffissamut aningaasanut inatsisip atuuffissaanut aningaasalersuinnermut tunngavissat aalajaatsuutiinnarnissaannut iluaqutaavoq.

### *Suliniutissat nutaat pisussat*

“Aningaasaqarnermi pissutsini nutaani akisussaaqatigiinneq” qulequtsiullugu 2026-mut Aningaasanut inatsimmut isumaqatigiissut isumaqatigiissutigineqarpoq aammalu nunatsinni aaqqissuusseqqinnernut aningaasaliinernullu ersarissunik sammivissaliilluni. Sammivissat pingaarnert sisamat, ataatsimoorlutik inuiaqatigiit aningaasaqarnerannik atugarissaarnermillu nukittorsaaussat, isumaqatigiissummi tunngavigineqarput.

Sammivissaq pingaarneq siulleq ilinniartitaanermut tunngassuteqarpoq. Tassani atuartitsinermi neqeroorutit nukittorsarnissaannut aningaasassanik immikkoortitsisoqarpoq, ilaatigut Knud Rasmussenip Højskoliani inuusuttunut naqinnernik ilisarinnissinnaanngitsunut immikkut suliniuteqarnissamut immikkoortitsisoqarluni. Peqatigisaanik ilinniartitaanermi pisinnaasanik atorluaanerunissaq aammalu nunarput tamakkerlugu ilinniartunut inissiat amerlanerulernissaat ukkatarineqarput, taamaalilluni inuusuttut amerlanerusut ilinniarnissamut periarfissaqalissallutik.

Sammivissat pingaarnert aappaat inuussutissarsiornermut sammitinneqarpoq. Aningaasanut inatsimmut isumaqatigiissut atitunerusumik piujuartitsiviunerusumillu inuussutissarsiornermi tunngaveqalersitseqataasussaavoq. Sinerissap qanittuani aalisarnerup nukittorsarneqarnissaanut, inuussutissarsiutinik mingutsitsinngitsunik ineriartortitsinissamut aammalu qarasaasiatigut paasissutissaasivinnut nukissiamik atorneqanngitsumik atorluaanissamut, suliniutissat aallartinneqassapput. Tamatuma saniatigut inuussutissarsiortunut akileraarusiisarnermik aaqqissuusseqqinnissaq, siuariartornissamut aningaasaliinernullu pitsaannerusunik sinaakktissiisussaq, Naalakkersuisut piareersarpaat.

Sammivissat pingaarnert pingajuat pisortat suliaasaqarfiisa sunniuteqarluarnerulernissaannut tunngassuteqarpoq. Aaqqissuusseqqinnermik suliaqarneq annertoq Naalakkersuisut aallartippaat, tassani pisortat suliaasaat pingaarnert aningaasartuutikillisaanerlu ukkatarineqarnerulissallutik. Aaqqissuusseqqinnermut isumalioqatigiissitaq allaffissorpallaarunnaarnissamut digitalinngorsaanissamullu inassuteqaateqassaaq, aammalu attaveqaasersuutitut suliniutissanik nutaanik piareersaaneq aallartinneqassaaq – ilaatigut

Upernavimmi imermik pilersuinerup aammalu Tasiilami inaallagiamik pilersuinerup isumannaarnissaannut.

Samnivissat pingaarnert sisamaat sulisussat amerlisinnissaannut tunngassuteqarpoq. Immikkut ilisimasallit suleqatigiit soraarnerussutisiassanut aaqqissuusseqqinnissamut siunnersuusiussapput. Amerlanerusut sivilisunerusumik suliffeqaannarsinnaanissaannut imaluunniit saniatigut sulisinnaanissaannut, suleqatigiit inassuteqaateqassapput. Tamatuma saniatigut utoqqaanerusunut aammalu innuttaasunut immikkut pisariaqartitsisunut inissiat amerlanerunissaat pillugu kommuninik suleqateqarneq nukittorsarneqassaaq.

Taamaalilluni aaqqissuusseqqinnertigut, aningaasaliinertigut sunnuteqarluarnerulersitsinikkullu inuiaqatigiit imminnut napatinnerulersinnissaannut ataatsimoorluni politikikkut piumassuseqarneq, 2026-mut aningaasanut inatsimmut isumaqatigiisummi takutinneqarpoq.

#### *Kommunit suleqatigineqarneri*

2026-mut ataatsimoortumik tapiissutit pillugit Naalakkersuisut kommunillu isumaqatigiissuteqaqqammerput, tamatuma kingunerisaanik ukiunut aningaasaliiffiusussanut ataatsimoortumik tapiissutit tamakkiisumik akinut aningaasarsianullu iluarsineqassallutik. Taamaaliornermi kommunit Naalakkersuisuniit pitsaanerusumik inissisimalersinneqarput, tassami Naalakkersuisut aningaasaliissutit atugassaak akinut aningaasarsianullu iluarsineqartanngillat imaluunniit akigititaq appasinnerutillugu akinut aningaasarsianullu iluarsineqartarlutik.

Namminersorlutik oqartussat kommunillu akornanni qanimut suleqatigiinnissap pingaaruteqarnera isumaqatigiisummi erseqqissarneqarpoq, pingaartumik isumagininnermut suliassa qarfimmi, utoqqarnut suliassa qarfimmi suliffissaqartitsiniarnermilu atugarissaarnermut suliassat qitiusut ingerlanneqarnerat pillugu.

Peqatigisaanik isumaqatigiissutigineqarpoq, 2026-mi paasissutissanut tunngaviusunut pisussanut pilersaarummut kommunit akiliutissaat Namminersorlutik Oqartussat matussusissagaat. Uteqattaartumik naleqqutinngitsumillu sulinissaq itigartinneqarluni pisoqartillugu, suliffissarsiortunut ikiorsiissutit naleqqussarnissaannut kommunit iliuuseqarsinnaanerat aamma annertusitinneqarpoq, tamatumanilu isumaqatiginninniarnernit kommunit annertuumik kissaatigisaat akuerineqarpoq.

Pisortat suliassa qarfiisa ingerlalluarnissaannut kommunini aningaasaqarneq nukittuumik inissisimasariaqartoq paaseqatigiissutigalugu suleqatigiinneq ingerlanneqarpoq. Minnerunngitsumik ukiuni aggersuni kommunit aaqqissuussaannerat tamarmi oqallisigineqartillugu, taamatut suleqatigiinnissaq pisariaqarpoq.

#### *Naalakkersuisut pingajussaanneerinissamut allannguutissatut siunnersuutai*

Pingajussaanneerinermi allannguutissatut siunnersuutit, teknikkikkut iluarsiinernik politikikkikkullu pingaarnersiutinernik imaqtut arlallit saqqummiunneqarput. Aappassaanneerinermiit ineriartorsimaneq allannguutissatut siunnersuutini

takuneqarsinnaavoq aammalu nutartikkamik patajaatsumillu tunngavilimmik 2026-mut aningaasanut inatsisip akuerineqarsinnaanissaa qulakkeerneqartussaalluni.

Allannguutit arlallit missingersuutitut sunniuteqanngillat. Tassani naalakkersuisoqarfinni suliassaqrarfiit iluanni, ilaatigut Attassinissamut Siuariartortitsinissamullu pilersaarut 2-mut ilaatillugu, Ilinniartitaanermut Naalakkersuisoqarfimmiit inuussutissarsiutitut ilinniartinnut, aningaasassat nuutinneqarput. Aamma aqqissuussaanneri allanngortitsinernut atatillugu allatut nuussinerit ingerlanneqarput, ilanngullugit siunnersuisarfiit katsorsaasarfiillu akornanni naleqqussaannerit kiisalu siusinnerusuklut ilassutitut aningaasaliissutit malitseqartitsineq.

Akilerartarnermut Aqutsisoqarfimmit nalilersuinerit nutaat tunngavigalugit isertitassanut missiliuinerit nutarterneqarput. Eqqussinnermut akitsuutit apparsimasut takuneqarpoq, pingaartumik imigassat aalakoornartortallit, tupat biillu ikummatissanik nunap iluaneersunik ingerlatillit eqqunneqartartut ikinnerulersimanerisa malitsigisaanik, kisianni tamanna aalisarnermit isertitat qaffakkiartorerisa ilaannik illuatungilerneqarpoq, tassani pingaartumik avataasiorluni saarullittassiissutini neriulluarnartumik ineriartortoqartoq takuneqarsinnaalluni. Taamaattumik isertitassanut tunngavissat ataasimoortut, piffissami aningaasanut inatsisip atuuffissaani sinneqartooruteqarnissaq, sulit tunngavississagaat naatsorsuutigineqarluni.

Teknikkikkut allanngortitsinermut ilaatillugu, naartunaveersaasersuisimanermut suliassamut atatillugu aningaasartuutissat iliuuseqarfiginissaannut 0-konto nutaaq pilersinneqarpoq. Allaffissornermut, suliassanik suliarinninnermut aamma ajunngitsorsiassanik tunniussinnermut Namminersorlutik Oqartussat aningaasartuutaasa missingersuutini eqqortumik passunneqarnissaat, allannguummi tassani qulakkeerneqassaaq. Aningaasartuutissat missiliorneqaqqaartut 4,5 mio. koruunit naammattutut isigineqarunnaarnerat pissutigalugu aningaasaliissutit allanngortitsisoqarpoq, tassami suliassat maannamut ilimagineqartut amerlanerusut paasinarsisimammat.

Kiisalu allannguutissatut siunnersuutit oqaasertaliussanik allanik nutaanik iluarsineqartunillu imaqarput. Suliffissarsiortunut ikiorsiissutitut maleruagassani allanngortitsisoqarpoq, taamaalilluni pisuni immikkut ittuni, innuttaasut uteqattaartumik suliffissamik innersuunneqartumik tigusiumanatik pisoqartillugu, ikiorsiissutit 0 procentimut appartinnissaannut kommunit periarfissaqalerlutik. Peqatigisaanik akigititanik aqqissuusseqqinnermut pisussamut atatillugu ineqarnermut tapiissutitut aqqissuussinnermik Naalakkersuisut iluarsisinnaanerannut periarfissaq atuutsinneqalerpoq.

Ataatsimut isigalugu aningaasanut inatsimmut isumaqatigiisummi akisussaassusilimmik sunniuteqarluartumillu aningaasaqarnermik aqutsinissaq pillugu siunnerfiit pingarnerit, allannguutissatut siunnersuutit tunngavissinneqarput, tassani aningaasanut inatsimmi pingaarnertigut sinneqartoorutit annikillisinnagit iluarsinerit pisariaqartut pissallutik.

### *Naggasiineq*

Piffissami aningaasaqarnikkut anigorniagassaqaarfiusumi, Naalakkersuisut aammalu partiit isumaqatigiissuteqartut, nunatta isumannaatsumik aqunneqarneranut 2026-mut aningaasanut inatsimmi ataatsimoorlutik akisussaaffimmik tigusipput.

Aningaasaqarnerup aalajaatsuutinnissaata piujuartinnissaatalu kissaatigineqarnerannut Aningaasanut inatsit takussutissaavoq, tassani atugarissaarnermut, ilinniartitaanermut ineriartortitsinermullu tunngavissat akisussassusilimmik nukittorsarneqarlutik.

Naggasiutigalugu suliaqarneq, aningaasanut inatsisissap suliarineqarnerata ingerlaneranut atatillugu – Aningaasaqarnermut Akileraartarnermullu Ataatsimiititaliami aammalu Aningaasaqarnermut Akileraartarnermullu Naalakkersuisoqaarfimmi aqutsisoqarfiit tassunga atasut ilanngullugit - ingerlanneqartoq, Naalakkersuisut sinnerlugit iluaralugu oqaatigerusuppara.

Taamatut oqaaseqarlunga 2026-mut aningaasanut inatsisissaq pillugu pitsaasumik pilersitsiviulluartumillu inersuarmi maani oqallinnissaq qilanaaraara.